



## IV GOVERNO CONSTITUCIONAL SECRETARIA DE ESTADO DO CONSELHO DE MINISTROS

---

### KOMUNIKADU IMPRENSA

Sorumutu Konsellu Ministru iha loron 6 fulan Abril tinan 2011

Konsellu Ministru hala'o sorumutu iha Kuarta-feira ne'e, iha loron 6 fulan Abril tinan 2011, iha sala Sorumutu Konsellu Ministru nian, iha Palásiu, iha Díli no analiza:

#### **1. Parseria Públiku-Privada (PPP) iha Timor-Leste**

Aprezentaun ne'e kona-ba PPP refleto empenhu forte Governu nian ne'ebé konsege halo di'ak liu servisu infra-estrutura liu husi envolvimentu boot ida husi setór privadu hodi halo finansiamentu, konstrusaun no funksionamentu infra-estrutura públika hirak ne'e.

Kriasaun infra-estrutura liu husi akordu PPP nian hetan dezenvolvimentu boot tebe-tebes setór privadu nian, hodi bele kontribui ba kresimentu Produthu Internu Brutu nian (PIB) ba moris naruk Planu Estratéjiku Dezenvolvimentu nian iha tinan 2011 to'o tinan 2030.

#### **2. Proposta lei kona-ba Primeira Alterasaun ba Lei Fundu Mina-rai nian**

Lei no 9/2005, loron 3 fulan Agostu (Lei Fundu Mina-rai) determina revizaun ida, iha tinan lima hafoin liu tiha Konstituisaun Fundu Mina-rai nian.

Diploma ne'e atu hodi altera regra no prinsípiu kona-ba investimentu nian, hodi permite flexibilidade boot liu atu diversifika aplikasaun sira, hodi aumenta, iha futuru mai, hetan fila fali rezultadu husi investimentu sira, hodi defini loloos limite espozisaun ba risku. Aleinde ida ne'e, lei ne'e klarifika rekizitu sira ne'eb'e mak atu kumpri husi Governu, bainhira presiza tebe-tebes atu halo transferénsia ida ba Orsamentu Jerál Estadu nian liu tiha Rendimentu sustentável Estimadu, hodi promove, lha futuru, flexibilidade boot ida ba entidade resposável ba jestaun Operasionál direta Fundu nian. Nune'e mós altera ona regra nomeasaun ba membru no kompozisaun ba Komite Asesoría ba Investimentu nian.

Dokumentu importante ida ne'ebé hetan konsiderasaun durante revizaun ba Lei ida ne'ebé produz tiha ona liu husi Grupu Traballu internasionál kona-ba "Fundu ba Rikeza Soberana"(Fundu Soberanu):Prinsípiu no Pratika Jerál ne'ebé Aseita, ne'ebé mak dehan mós "Prinsípiu Santiago nian".

1

Prinsípiu hirak ne'e reprezenta esforsu kooperasaun internasionál ida kona-ba identifikasaun ba prátika jestaun nian ne'ebé di'ak liu fundu sira ne'e nian, liuliu, iha área sira temi kona-ba governasaun no política investimentu nian, no Governu propoin revizaun ida ne'e ba Lei Fundu Mina-rai nian tuir prinsípiu sira ne'e, atu aseguira katak Timor-Leste kontinua sai ezemplu ida kona-ba prátika internasionál ne'ebé di'ak liu iha nivel jestaun fundu sira hanesan ne'e.

### **3. Dekretu-Lei ne'ebé kria Konsellu Kombatente Libertasaun Nasionál**

Diploma ida ne'e prevé estrutura ba Konsellu Kombatente Libertasaun Nasionál, ne'ebé harii iha fulan Feveiru tinan ida ne'e nian husi Parlamentu Nasionál liu-husi alterasaun artigu 35 husi Estatutu Kombatente Libertasaun Nasionál. Tuir artigu ida ne'e, Konsellu Kombatente Libertasaun Nasionál, mak órgaun úniku ne'ebé reprezenta interese Kombatente Libertasaun Nasionál hotu-hotu nian, no " órgaun konsulta Governu nian ba asuntu hirak ne'ebé iha relasaun ho defeza interese veteranu sira nian (...) nomós ba asuntu sira seluk ne'ebé ko'alia kona-ba kombatente sira Libertasaun Nasionál nian".

Artigu ne'e define mós, katak: "estrutura Konsellu Kombatente Libertasaun Nasionál nian sei define ho Dekretu-Lei, hafoin halo tiha konsulta ho organizasaun sira ne'ebé reprezenta Kombatente Libertasaun Nasionál sira".

### **4. Dekreto-Lei kona-ba Fó Lisensa ba Atividade Komersial sira**

Objetivu Dekretu-Lei ida ne'e nian atu estabese mekanizmu balun atu korrije frakeza hirak ne'ebé mosu iha setór komérsiu nian, no iha tempu hanesan, bele loke dalan atu kria organizasaun ida ne'ebé boot, aproximasaun no konverjénsia ba tipu komérsiu hotu-hotu. Nune'e, atu garante dixiplina ne'ebé boot liu iha atividade komersial sira, atu bele hatán evolusaun ne'ebé hatudu daudauk iha setór ne'e. Atu dehan de'it katak, komérsiu sai hanesan elementu fundamentál ba estrutura ekonomia moderna ida, tanba ninia influénsia ne'ebé boot iha estruturasaun territorial no populasionál sociedade nian, iha kriaun empreza no empregu sira.